



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 3

Madrid Masters: Kidambi Srikanth quarterfinal-i iogo

Surgical strikes ajanga kiralongrartem tongtoret raksatsüogo: Rajnath



VOL. XX NO. 168 (ADOK 168) DIMAPUR ROGONÜ (FRIDAY)

METSÜREMI (MARCH) 31, 2023

₹ 5.00

Municipal Act agientsü Assembly nung lemtetba Naga tsür temi mepelar

Kohima, Metsüremi/March 30 (TYO): Naga Mothers' Association (NMA) ajanga Department of English, Nagaland University den lungjemer Municipal Elections dak sendakba ken o state level nung tetsür lenirtemi jembitsü asoshi Ladies Hall, Nagaland University, Kohima Campus Meriema nung sentong ka March 30, 2023 nü ayongzüka liasü.

Anogo tepiyong jembiba sülen item pangzüng ya renema liasü:

1. Municipal Act 2001 aser First Amendment, kong urban local bodies nung shilem 33 wazüka ayutsü shia alir, ibaji Naga tsür temi busemer.

2. Iba Act agientsü telemtetba agiba Naga tsür temi tai apur kechiaser nüburtem den mejembi mesüra tetsürtem den shisa magitepi iba telemtetba ya agi.

3. Assembly session nung iba ken o jembidang tetsür MLA ana ola madoki liasü aser iba Act agientsü asoshi bill agizükba mapanga tai mapu mesüra anema menokdak ta Naga tsür temi angateter.

Sentong tenzüka NMA tir Abeiu Meru-i jembidang Municipal Elections onük jembitsü asoshi temolung agüja aruba tetsür lenirtem aser ano sentong nung adener ajak pelashishia agizüka liasü.

Prof. Rosemary Dzüvichü, Department of English aser Former Director, Women Studies Centre ajanga iba sentong nukjidong rateta jembiba mapang, urban local bodies nung tetsür atema menden shilem 33 wazükja aliba Nagaland Municipal Act dak sendakba nung Naga tsür tem kota timtema aru, iba indang tejangja tatalokbatem shia liasü.

Iba sentong nung o jembitsü asoshi Zheviholi Swu, Legal Advisor aser Dr. Theyiesinuo Keditsu jaoka liasü.

Dr. Keditsu-i 'Feminism in the Naga Context' onük nung ajemdaker jembidang, Naga tsür temi timtem ajangshibatem tejangja metettsü nüngdakba shia liasü.

Tetsür nem temeden kasa agütsütsü asoshi jembiba aser inyakba ya tanü-asüng tentetba

mesüra western ideology lir ta jembiba aser angatetba ya tai lir ta lai ashi.

Dangar melenshistsü dang nungi pei melenshistsü temelaba lir, saka kibong mesüra lokti nung tebur tekolakba asüba tebilemstü aser tashidak ya anema ajaki nodaktsüla, ta lai ayongzüka.

Kibong mesüra loktiliba nung tebur tekolakba asüba senmang tamajung den yimjung aser tashiyim medeni tokteptsü asoshi tasa yanglutsü nüngdaker, ta Dr. Keditsu-i ashi.

Iba sentong nung taoba mapang NMA aser taoba mapang aliba Joint Action Committee nung legal advisor inyaka alila Zheviholi Swu-ia jembiba liasü.

Lai Municipal Act 2001 nung sendaka aliba ozüng tem aser ken o benoker, Government of Nagaland aser Court ajanga tanü tashi ken o balala jembiba aruba indang lokti den lemsatapa liasü.

Iba Act ya constitutional legislation ka lir, anungji iba Act mapa kuma inyaktsü ya paidoktsü makokba ka liasü aser okadak iba ken o tejembidak lia Nagaland Legislative Assembly ajanga iba bill agientsü merang, ta Swu-i ashi.

Iba sentong nung NMA tenteter aser tang advisor teinyakdak Sano Vamuzo, Prof. Lungsang, Director, Women Studies Centre, Nagaland University; Abeni TCK Lotha, Chairperson Indian Red Cross Society aser Advisor NMA nung temia jembiba liasü.

Lokti nungi shilem agia jembishinüba mapang NDPP, BJP aser NPF tenüng nung adenertem aser Naga Women Hoho Dimapur, Zeliangrong Mepui Organisation aser Pochury Mothers Association nungi teshimtet nübu temia jembiba liasü.

Sentong tatem NMA General Secretary Lochumbeni Humtsoe-i melepzüng o jembiba liasü.

Iba sentong nung wadang, kin aser lokti tentet balala nungi tetsürtem, NGOs, academics, osangbener, political party nung tetsür lenirtem, University aser dangalen nungi PhD research scholars aser university nung azünger tetsür temi shilem agia liasü.

NLA Speaker Sharingain Longkumer-i Governor ajuru

Dimapur, Metsüremi/March 30 (TYO): Speaker, Nagaland Legislative Assembly, Sharingain Longkumer tanaben Speaker shimteter Nagaland Governor, La. Ganesan den tang mezüngbuba March 30, 2023

nü Raj Bhavan, Kohima nung ajurua liasü.

14th Nagaland Legislative Assembly indang session mezüngbuba March 21, 2023 nü alidang Governor La. Ganesan-ia House nung mezüngbuba jembiba liasü.

B20 Meet asoshi renemshiba Chief Secretary-i repringshim



Kohima nung B20 Meet alitsü asoshi renemshiba asadanga senden ka Civil Secretariat, Kohima nung March 30, 2023 nü amendang tangokba noksa ka yangi angur.

Dimapur, Metsüremi/March 30 (TYO): Kohima nung B20 Business Meet alitsü atema renemshiba asadangtsü senden ka Chief Secretary Nagaland, J Alam, IAS ajanga March 30, 2023 nü Civil Secretariat, Kohima nung ayongzüka liasü.

G20 delegates tem Dimapur Airport tonga aruba, aser parnok asemnü buba nung mao tashi Kohima nung anenzüka alitsüba indang tejangja jembishinüba liasü. B20 Meet dak sendaka aliba department nungi AHODs aser HoDs temi parnok sentong

lemsatapa liasü. Iba senden nung security, logistics, publicity, department balala indang presentation aser danga inyakyim balala indang jembi aser shisa lemsatapa nüngdakba tem melenshitepa liasü.

Urban Local Bodies election athir: State Election Commission

Dimapur, Metsüremi/March 30 (TYO): Nagaland Municipal Act (Repeal Act 2023) ajanga Nagaland Municipal Act 2001 agientsü renemba nung ajemdaker Urban Local Bodies atema election agitsü aliba athir, ta State Election Commissioner, T. Mhabemo Yanthan, IAS ajanga March 30, 2023 nü sangdong ka nung ashi.

State Election Commission, Nagaland ajanga March 9, 2023 nü sangdong ka nung state nung Municipal Council asem aser

Town Council 36 nung election agitsü atema 'Election Programme' sangdonga aliba tarutsü nung totuyubatem magütsü tashi thina alitsü metetdaksür, ta sangdong ajanga ashi.

State Election Commission ajanga March 9, 2023 sangdong nung ULB election atema nomination maparen April 3-10, 2023 anogotem renemtsü, April 12 aser 13, 2023 nü nomination repringtsü aser April 24 tashinung nomination tenüng

meyipa agitsü metetdakja liasü. Iba sülen election ya May 16, 2023 nü agitsü aser May 19, 2023 nü vote azüngtsü, ta shia liasü.

Ajisüaka Nagaland nung kin aser lokti tentet balala aser talisa tribal hoho temi Nagaland Municipal Act 2001 nung temelenshistsü kar lir aser aji merepringshi tashi ULB election nung shilem magitsü ta nokdakba yong 14 buba Nagaland Legislative Assembly züngsem 60 prongi iba Act agientsü molungtep.

NEMS indang Executive Committee senden amen

Dimapur, Metsüremi/March 30 (TYO): Nagaland Education Mission Society (Samagra Shiksha Nagaland) indang 36 buba Executive Committee senden Chief Secretary, J. Alam, IAS lenisüba kübok Chief Secretary indang Conference Hall, Civil Secretariat, Kohima nung March 30, 2023 nü mena liasü.

Senden nung audit report indang onük nung ajemdaker jembishinüba aka aser elementary aser secondary education atema second installment agizükba

indang lokti nem metetdaksü. Iba senden nung PowerPoint presentation ka agütsü aser yangji taoba küm Government aser Private School tem nung enrolment tera ajema akuma sayua liasü aser central school tem nung tera renloka liasü.

Maneni Nagaland nung aliba Government School tem nung class shia tesayurtem aliba indanga lemsatapa liasü.

Metokmeperi putettsü asoshi kaketshir indang profile den Aadhaar sendakteptsü indanga parnoki jembiba liasü.

Training agir aliba aser magi aliba tesayurtem indang education profile benoka jembiba liasü.

Uniform aser text book tem lema agütsüba, media & community mobilization, National Initiative for Proficiency in Reading with Understanding (NIPUN) aser Numeracy Bharat Programme, KALA UTSAV, Virtual reality lab aser vocational education amala inyaksangshi indanga iba senden nung benoka jembiba liasü.

Indian Express-100 nung Assam CM Himanta densema lir

Guwahati, Metsüremi/March 30 (Agencies): Indian Express-100 (IE-100) 2023 nung Assam Chief Minister aser BJP lenir Himanta Biswa Sarma ya 'Most powerful Indian' jenjang 17 buba nung lir.

Assam CM, Himanta ya Northeastern India nungi yimten yimsüsür tajungtiba rongnung ka lir aser taoba küm iba ranking nung jenjang 32 buba nung liasü saka taküm jenjang 17 buba tongtet. Sarma ya 2021 küm Assam

CM akum aser 2019 küm pa Assam indang finance minister inyakdang jenjang 56 buba nung liasü.

Pai jenjang 17 buba tongtetba ya Assam nung asoshi tejak tentetba mapang ka lir, kechiaser Assam mesüra region nungi national level nung kangabo züngshia maru.

Iba IE-100 nungya Ato Kilonser Narendra Modi mezüngbuba jenjang nung lir aser Union Home Minister Amti Shah

jenjang tanabuba nung lir.

Jenjang tasembuba nung External Affairs Minister S Jaishankar aser pezübuba nung Chief Justice DY Chandrachud lir.

Uttar Pradesh Chief Minister Yogi Adityanath ya jenjang pongububa nung lir.

Himanta Biswa Sarma dak alaka Assam nung shinga top 20 nung mali.

Iba list nung Congress lenir aser taoba MP, Rahul Gandhi ya jenjang 15 buba nung lir.

Minister Metsübo Jamir-i tenüngsang agütsüba sentong ka ayongzük



Nagaland Rural Development & SIRD Minister, Metsübo Jamir tenüngsang agütsüba sentong nung tangokba noksa angur.

Mokokchung, 30 March (TYO): Nagaland Rural Development & SIRD Minister, Metsübo Jamir-i 30th March, 2023 nü yangi par ki Mokokchung nung tenüngsang agütsüba sentong tulu ka ayongzüka kaogo.

Minister Metsübo-i iba sentong nung jembidang, Tsüngremer maongka tulu den constituency nüburtemi takok tajung nguja tanaben pa nem yimli tulu agütsüba asoshi pelaba den teyariteper ajak nem tenüngsang agütsü.

Aor ya kin ulura küma aor, aji oda, yimti balala nung alirtem ajak pepei meten paksa aoba angur, anungji, 'koba tesem nung südir süaka party, yim, kin-kidong kecha mebendangi asenok lungjemer kodaser tejakleni aotsü ta asüba kü pungmang ka lir, iba tangatetba nung asenok ajak lidaktsünür', ta pai mepishia ashi.

Tzükong 6 kübok Ao lima yim ajak kasasa repringtsü

merangtsü aser Aor legislator-tema kati ka den yariteptsü jembitepa lir, ta paisa shisem.

ULB election dak sentakba nung olen ka ashidang, ULB election ji karibo agidi ta shiogo, aji saka, nüburi asenok shima sorkar kümdaktsür ano nübur anema apusobaji tim masü, ta pai Nagaland CM N. Rio-i ashiba o ka metetdaksü. Municipal Act ji Naga nungeri aginüba ama tajungba yanglutsü merangtsü, aji oda, Act ka yangludangji ashiko nisung ajakbo temulung masütsüa akok, saka iba nungji ajaki atsüanem kadaktsünür, ta pai mepishia ashi.

Paisa "clean election" indang süokdang, ABAM-i clean election dak sentakba nung nüburtem nem tangatetba tajung agütsüba asoshi pelar. Aji saka, ita ka/ana "clean election" atema inyakbaji teperi masü saka teti atema "Clean Nagaland" asoshi inyaktsüla, ta paisa tebilemba ka lemsatetp.

"Ita ka ana merükba jagi majungtsü, anungji, teti merüksü asoshi merangtsüla", ta paisa shisem.

Iba sentong nung NDPP central office, NDPP Mokokchung region, BJP Mokokchung District, NDPP 27 Mokokchung Town A/C, 27 A/C Women Organization, 27 A/C Youth Organization, 27 A/C kübok aliba ward 5 nungi yimden, 27 A/C kübok NDPP unit office 5 nungi, Ungma Village Council, Mokokchung Town Longsa Senso Telungjem, Sangtemla Ward Yimden nungi meyongertemi shilem agia jembu. Mulungtet telok Ao Senden-i anir telok balala nungi aser temulungertem aika iba sentong nung arua aden. Iba sentong Longsa Home Missionary Tiayangar Jamir den temoatsü meshia sarasademer tenzük aser MTBA Assoc. Pastor, Rev. Temsuwati Kichu den tenüngsang agüja sarasademer tembang.

Business Studies atema April 5 nü tatidang agishitsü

Dimapur, Metsüremi/March 30 (TYO): 2023 HSSLC Commerce Stream tatidang agütsüba repeater candidate aseme March 18, 2023 nü "Business Studies" subject tatidang magütsüetba indang Board nem metetdaksüogo.

Iba ya Board-i January 19, 2023 nü district WhatsApp group tem nung routine lemsatetpa ajanga asütsü, kechiyong aibelena March 18 nü subject ana agitsü atema routine ka lemsatetp, koba minute 30 tsüngda agintsür shitakba routine lemsatetpa liasü.

Ajisüaka social media ya kanga takara aser active asünung candidate kar ket nung routine tejenba bena liasü aser iba ajanga parnok March 18 nü "Business Studies" subject magütsüetba liasü.

Anungji item kaketshirtem tejangraba apir Board-i, "Business Studies" subject atema tatidang balaka agitsü, ajita asünungdang item kaketshirtem ya sentoka metoktsütsü. Kaketshir shirnok tatidang magütsüet parnok dang iba tatidang nung shilem agitettsü.

Anungji item kaketshirtem

dang tatidang agütsütsü janrara nagaboard@gmail.com ajanga April 3 nü tashi nungbo Board nem osang agütsütsü metetdaksüogo.

Examination centres tem ya April 4, 2023 nü 11:00 ako tashi nungbo metetdaksütsü.

Business Studies atema tatidang ya April 5 nü 9:00 ako nungi 12:00 tashi agitsü.

Centre Superintendents aser Institutions tekolaktem dang iba osang ya takaratiba nung agütsütsü atema metetdaksüogo.

Mokokchung nung NPCCHH & NRCP training agiogo



Dimapur, Metsüremi/March 30 (TYO): March 30 nü Chief Medical Officer, Mokokchung Office Conference hall nung SMO, MO aser CHO tem nem National Programme for Climate Change & Human Health aser National Rabies Control Programme dak sendakba nung tangazükba agütsüogo.

Training sentong nung shilem

agirtem nem National Programme for Climate Change and Human Health (NPCCHH), tatsük dak sendaka aliba shirangshikotem, Rabid azü jangjaba yimba aser kiset shiruru atema Prophylaxis/vaccination densema azüi anguba nungi kümzüka alitsü atema tasa, Animal bite management & Rabies prophylaxis aser sentong anaprongla dak sendakba nung

report agütsüba yimya sayua liasü.

Training sentong nung shisalen sayurtemji Dr. Lhishelo Tshuh DVBO & DSO, Dr. Limanaro DPO-NCD, Dr. Watitoshi, Veterinary Assistant Surgeon Mokokchung, Dr. Joshua L, Medical Officer CHC Tuli aser Dr. Toshimongla Longkumer, Epidemiologist (IDSP) Mokokchung nung liasü.

NSCN/GPRN-i züngsem ka mapang nungi anentsü

Dimapur, Metsüremi/March 30 (TYO): NSCN/GPRN-i, UT-1 kübok Burma Camp, Dimapur nung alir Hotokhu Ayemi'er jabaso Rolex Ayemi, Leacy züngsem mapang nungi anentsüba metetdaksüogo.

Secretary, Kilo Affairs office nungi tetuyuba agütsüba nung pai, NSCN/GPRN Yezabo nung aibelena linük anema inyaksangshiba inyakyim nung shilem agiba atema mapang nungi anentsür, ta shia lir.

Mao, NN & T. Khel Market committee-i teyari agütsü



Kohima, Metsüremi/March 30 (TYO): Mao, NN aser T Khel Market Relief Committee-i tanü, February 27 nü Mao Market mi lendong agi kongshir aliba ki kibur, shishilembartem aser mi agi kongshiba ki balala nung alirtem nem senotsü teyari agütsüogo.

Temulungertem, Arogo tem, Kohima Chamber of Commerce & Industries, Manipur Chief Minister, Nagaland aser Manipur nungi legislator tem-i committee nem lendong agi kongshir alirtem nem teyari agütsütsü atema sen lakh 28 tenla agüja liasü, ta committee züngsemtemi metetdaksü.

Nagaland sorkari taoba

mapang iba shishilembadak yokyatsüyartem aser shishilembaba tesem nung atongtepa aliba kitem nung alirtem nem teyari sen lakh 50 agüja liasü.

Parnokisa, temulungertemi bendentsüba tenla ya shishilemba dak ki yanglushitsü atema aser nisung aliba ki kiburtem, variety shop vendors 109, aonsotsü ayoker 44 aser kibong 17 nem agüja liasü, ta ashi.

Iba mi ajanga Bethel Hospital aser Sokhriezou Market complex nata terara kongshia liasü, ajisüaka kiburtemi teyari agütsüba magizüki liasü, ta committee-isa metetdaksü.

Kohima Science College nung Workshop ka agiogo

Dimapur, Metsüremi/March 30 (TYO): "Ethnographic Fieldwork and Field Recording" dak sendakba nung March 29 aser 30 nü Kohima Science College, Jotsoma nung international workshop ka ayongzüka agiogo. Iba workshop ya Department of Anthropology-i ayongzüka liasü. Iba workshop ayongzüka agitsü atema department of anthropology, Kohima Science College, Jotsoma, The Highland Institute, Kohima, Anthropological Society of Nagaland, Kohima, aser Firebird Foundation for Anthropological Research, USA-i senotsü teyari agüja liasü.

Workshop nung Naga nunger nungtugu anthropologist, taoba college principal aser retired director of the Department of Higher Education, Government of Nagaland aser Governor Gold Medal ngur alila Dr. Anungla Aier-i okila jembia liasü.

Kasa mapang nung ethnusicologist Dr. Christian Poske, shiba eastern aser northeastern India aser Bangladesh nung performing arts dak sendakba nung kanga süoki ia inyakogo aser Highland Institute, Kohima nung fellow ka lir pa shisalen sayur liasü.

Sentong nung Dr. Anungla Aier-i "Fieldwork among Indigenous Communities" onük nung ajemdaker jembu. Indigenous kintem koda tangar dang nungi balaka iba indang jembiba mapang lai, indigenous kintem tacit knowledge aser tajangshibatem metetdaksütsü aser angatetsü atema ethnography ya method aser product ka ama koda tongtibang iba indang lemsatetp.

Laisa, ethnographic method ya qualitative research method ka amo

koda tongtibang aser iba ya koda anthropological research nung dang masü saka market research densema tanga social science disciplines tem atema tagidak lir aser benoka inyaksangshitettsü iba indang lemsatetp.

Dr. Aier-i ashiba agi, ethnographic method ajanga kin ka inyakyim aser sobaliba angatetsü atema teyari agütsür. Lai, shilem agirtem den külemi fieldwork balala nung inyakba tajangshiba aser field research dak ethical ken o tem sendaka aliba indang lemsatetp. Dr. Aier-i, tesayur kaka masü saka tangazüker kaka akümsü ajungshir la o tembanga liasü.

Kasa mapang nung Dr. Christian Poske-i, "Ethnographic Fieldwork in Ethnomusicology" onük nung ajemdaker jembiba mapang ethnomusicology aser anthropology na tesendaktep indang lemsatetp. Pai ethnomusicology ya social aser cultural context nung music bushisüngdangba aser lokti ka nung social, cultural, economic aser political implications tem asadangba ka lir ta ashi.

Iba sülen Dr. Poske-i sessions trok agi aser session ka tembangba shia group activity session agia liasü. Session tem ya bushisüngdangtsü atema technical inyakyimtem sayutsü aser data bendentsü aser mangaoka ayutsü atema hadir aser device balala koda amshitsü iba dak sendakba nung tangazükba agütsüba dak rangloker agia liasü.

Session tem ya, Participant observation & interviews, research ethics & informed consent, audio & video recording practice, data management, aser cataloguing field recordings amala onük dak ajemdaker agia liasü.

Indore nung tekülem kidang atem chirep; nisung 13 asü



March 30, 2023 nü Indore nung aliba Shri Baleshwar tekülem kidang tzübo nembangba tesem chireper aliba noksa nung angur. Iba lendong nung nisung 13 sügo.

Indore, Metsüremi/March 30 (Agencies): Indore nung tekülem ki ka nung atem chirepba lendong nung nisung 13 asü aser nisung aika kümzükogo.

Hindu nung 'Ram Navami' benjung amongdang Shri Baleshwar tekülem kidang tzübo nembangba atem chirepa iba lendong atalok.

Osangbenertem den jembidang Madhya Pradesh Home Minister, Narrotam Mishra-i, "Iba lendong nungji nisung 13 asü. Tasü mang 11 (tetsür 10 aser tebur ka) nguogo

asere nisung 19 kümzüka liasü saka tesülen parnok rongnung nisung ana asü," ta metetdaksü.

Tenük kuli alirtemi ashiba agi, iba lendong atalokba mapang nungji tekülem kidang tzübo nembangba tesem nungji nisung 20 dak tema nokdaka liasü.

Iba lendong atalokba sülen Madhya Pradesh Chief Minister, Shivraj Singh Chouhan-i ketdangsertem dang tekaraba nung kümzükba maparen inyaksü tuyua liasü.

Chief Minister's office ajanga, iba lendong nungjagi

nisung 10 kümzükogo aser nisung 9 tang tashi mekümzükoteter, ta metetdaksü.

Iba lendong atalokba osang angashia Ato kilonser, Narendra Modi-i mangyim jashi lemsatop.

Modi-i twitter ajanga, "Indore nung lendong atalokba osang angashia jashir. Ni Chief Minister Shivraj Chouhan den jembia osang metetpelaogo.

State sorkar leniba nung kümzükba maparen kanga kera inyakdar. Iba lendong nung takoksa angurtem aser parnok kibongtem atema ni sarasademsür," ta lemsatop.

Surgical strikes ajanga kiralongrartem tongtoret raksatsüogo: Rajnath

New Delhi, Metsüremi/March 30 (Agencies): Brihostibarnü Defence Minister, Rajnath Singh-i, India nung arrtsütem kümzükka lir aser India-i surgical strikes aoba ajanga kiralongrartem tongtoret raksatsüogo, ta metetdaksü.

'India Rising Conclave' sentong nung jembidang Singh-i, "China den süaka Pakistan den süaka Indian armed forces-i tim telanzüba agütsür," ta ashi.

Alima nung kiralongra anema India leniba nung inyaker, aser iba tebilemsü samatsütsü atema inyakba maparen nung aikati India nungiter, ta pai ashi.

"Kiralongra anema surgical strikes aoba ajanga kiralongrartem tongtoret raksatsüogo. India dak tashi lir

asere India-i pei litsü nung dang masü saka bendanger linük nunga kiralongra anema raratetsü, ta alima dang sayutetogo," ta pai metetdaksü.

"Ibaji India sorkari temelungtetba tulu yur inyakba ajanga lir. India-i nungdak makaba nung tangar anema meinyaker, saka linük telongjem aser akhümket yirutsütsü merangertem dangbo India-i tai matoker, ta hadir amai kiralongra amshiba linüktemi meteta dang lir," ta pai ashi.

India nung arrtsütem kümzükka lir, rongsenketzüng jenjang tajungba akümer aser alima matsügdang linük jenjang tajungba akümer; Ato kilonser, Narendra Modi lenisüba nung India ya alima

nung tashi taittiba linüktem rongnung ka kümddar, ta defence minister-i ashi.

Pai ashiba agi, Jammu & Kashmir nung Arrla 370 agienba ya sorkari temelungtetba yur inyakba tatishitsü rongnung ka lir; iba Arrla agienba ajanga J&K Union territory nung yimjung aser terenlok lir, ta paisa metetdaksü.

"Taoba mapang Ato kilonser, Atal Bihari Vajpayee lenisüba kübok 1998 küm Pokhran nung nuclear tendanga liasü. Tanübo asen li nung asenoki missiles tulu, tanks aser raraba hadir balala yangluteter. Iba ya yimtenren tsütsü temelungtetba yur inyakba ajanga lir," ta pai ashi.

BJP aser Congress napronglai onok (JDS) ajuruogo: Kumaraswamy

Bengaluru, March 30 (Agencies): Brihostibarnü JD(S) lenir, H D

Kumaraswamy-i, Congress aser BJP napronglai par party den tesendaktep yangluner, kechiyong Karnataka assembly election agiba sülen sorkar akümtsü atema party anapronglai par party teyari nungdaksü akok, ta ashi.

Paisa, party anaprongla nungjagi lenirtemi pa ajuruogo, ta metetdaksü.

Osangbenertem senden ka nung jembidang taoba mapang Karnataka Chief Minister, Kumaraswamy-i, taruba election nunga nüburtemi par party moatsütsü imlar, ta ashi.

National party tem nungi lenirtemi na ajurur asü?, ta asügdangba langzüdang pai, "Party anapronglai tebilemsü akar, ibayongji party anaprongla nungi lenirtemi ni ajuruogo. Parnok aruba tetezüji metetsüla, aser ibaji tanga kecha masü saka nüburtem temoatsü ajanga anogo shia JD(S) tashi taitba akümba agi lir," ta ashi.

Paisa, "Onoki menden 65-70 nung takok ngur teloktep sorkar akümtsü atema national party ana jagi onok teyari meshitsü atema ataa alitsüji kü nükjidong masü. Majority ngua

onoki sorkar akümtsü atema ni kanga meranga inyakdar," ta metetdaksü.

Taoba mapangtem nunga JD(S)-i mapang balala nung BJP aser Congress den lokteper sorkar küma liasü. 2006 küm January ita nungi tenzüka ita 20 tashi JD(S)-BJP teloktep sorkar liasü aser 2018 küm May ita nungi ita 14 shi JD(S)-Congress teloktep sorkar liasü, aser iba mapang nungji pa (Kumaraswamy) Chief Minister liasü.

Tasügdangba ka langzüdang pai, "Siddaramaiah (Congress lenir)-i, JD(S)-i BJP den telemtetba agiogo ta jembir. Ano külen Chief Minister (Basavaraj Bommi)-ia, JD(S)-i Congress den telemtetba agiogo ta jembir. Parnoki onok (JDS) majuru asübo yamaji jembitsü ma? Tangbo parnoki ozü party anema meinyaktetsü," ta ashi.

Karnataka nung assembly menden 224 lir aser JD(S)-i parnok kijai sorkar akümtsü nükjidong nung tajemba agi menden 123 nungbosa takok angutsü nükjidong yur inyaker.

May 10 nü Karnataka nung assembly election agitsü aser May 13 anogo nung vote zünga election agiba osang sangdongtsü.



Sheopur, March 30, 2023: Madhya Pradeh kübok Sheopur district nung aliba Kuno National Park nung tawa mepoba merok-keyi chanutem noksa nung angur. Tamalen merok-keyi tetsü ka Namibia linük nungi bener arua iba Park nung puokba sülen tawa tetsü jagi techanu pezü mepo.

Linük nung Rajasthan ya 'Model State' ka kümddar: Ashok Gehlot

Jaipur, March 30 (Agencies): Brihostibarnü Rajasthan Chief Minister Ashok Gehlot-i, pai aniba sorkari benokba welfare schemes ajanga nisung lakh aika tajanzük nguogo aser tangbo linük nung Rajasthan ya "model state" ka kümddar, ta metetdaksü.

Rajasthan Day anogomong nung state sorkar indang schemes balala ajanga tajanzük angurtem nungtem nung ayongzükba sentong nung jembidang Gehlot-i, "Sorkari benokba scheme balala ajanga nisung lakh aika tajanzük anguba agi ni melung asür," ta ashi.

Iba sentong nungji nisung aika aden aser online ajanga-a nisung aika denogo.

Chiranjeevi Health Insurance scheme densema state sorkari benokba scheme

balala metetdakja Congress lenir Gehlot-i, "Tanübo Rajasthan ya model state ka kümddar aser linük nung tekeratiba ainba state rongnung densema lir. Rajasthan nung gari lenmang tajungtiba, medical service tajungtiba aser universities aika aliba linüki tetshir," ta metetdaksü.

Chief Minister-isa, "Item scheme ajanga 2030 küm tashi nungbo state nung aliba kibong ajak azükarutsüji kü mangdang lir," ta ashi.

Iba sentong tembangba sülen osangbenertem den jembidang pai, "Schemes balala mapa küma inyaksüji state sorkar atema tongtibangtiba mapa lir," ta ashi.

Iba sentong nungji State Congress Tir, Govind Singh Datasara den minister tem, MLA tem asr party lenirtem aika aden.



March 30, 2023 nü Kolkata nung BR Ambedkar kürakyanglu anasa West Bengal Chief Minister aser TMC tongti, Mamata Banerjee leniba nung party lenirtemi tanü agi ananübuba longkak aيتدang tangokba noksa nung angur. Centre sorkari West Bengal bendangshidanga züngshir, ta tai tonglokja TMC-i longkak aiter.



TIR YIMYIM YIMOBILEM (EDITORIAL)

DIMAPUR ROGONÜ, METSÜREMI(MARCH) 31, 2022

Ochi agidang 'surplus budget' yanglutettsü

Asenoki tajung aika bilema jembiyonga, Nagaland nung terenlok mapa takok ngua meinyaktettsüsa timatempa ya sen makaba agi masü aser ali maliba agia masü saka nisungi mapa shitak inyakba kuli mesayutetba ajanga lir. Tanur tamajung alidak tesayur aser tsüraburtemi ozüng tesashi aika lateta yutsü ama, Nagaland ama tashi manger taintem aika alidak pei lima aser nübortem asoshi government-i senotsü agütsüba shitak amshia terenlok mapatem inyaksü atema inyakyim telatet ishika agüja lir. Item rongnung senotsü shitak amshia mapa inyakba kuli 'Utilisation Certificate' mapang shitak- shitak nung mapa shitak renema mesayu tashi agütsütsü aser ano center government nungi nisung tenüngteta teyari yokba senotsübo state government ajanga masü saka teyari angutsü pur dangi indang-indanga pa mesüra la bank account nung 'Direct Benefit Transfer' inyakyim ajanga senji enoktsütsü. Iba jagi office nung inyakerteri süngojemtsü sen imlaba, meshiba aser agütsüba tai nungi nisung ajak jenbuttsü. Iba inyakyim jagi tantsür tamburtema 'Old Age Pension' sen abeni bank-i aotsü menüngdaker aser yimtaklirtema shirnoksa Mahatma Gandhi National Rural Employment Guarantee Scheme ama sentong kübok mapa inyakba atema taa angutsü ali, item taa ajakji government nung ketdangser shinga keta majangi indangindanga pei bank account-i arutsüsa inyakyim tajung lateta yuja lir. Iba ama inyakyim jagi asenok aika tai memenai nübortem tenzükba mapa nung ochishia inyaktettsü aser teyari angutsü purtema mapa dang shitak inyakerbo senjang kata majem aser melalui shitak angutsü. Ajisüaka, asenok ajak tia majung, pi limapurtemi asenok Khristan purtem tai memenadaksüi mapa shitak inyaker senotsü teyari shitak agizüka agitsüsa inyakyim lateta yutsüba nung asenoki manidaktetter, kechiyong asenoki tangar meyong tilaka miimzüka magibo ayip majanger aser mapa shitak inyaker taa shitak agizüka agitsübaji asen mapa nung takoksa tulu angu amai bilemer. Aji oda, asenok Nagaland nung alir Khristan-temibo mapa meinyak ser tiyazü sen aika agizüka takar akümba nung dang amanger. Iba tamangba yimsü jagi Nagaland nung center government nungi sen meshia inyakba mapatem indang 'Utilisation Certificate' magütsütetba ajanga tanüngba sen marur, anungji tanüngba mapa merenemtet nübortem akoksadaksüba mapatem aika lir. Aji oda, sen crore 300 meshia amshiba kuli kaket magütsütetba ajanga sen crore 3000 meshiloka mapa renema inyaksüba mapatem aika merenemtet nübortemi meteta aser memeteti nisung ishikati Nagaland akoksadaksüdag. Nagaland nung sen makaba agi kilentzua merüka meyutetba indang jembir, saka Nagaland nem agütsütsü atema center government ket nung sen peria dang lir. Ajisüaka, akhidang amato Delhi nung alirtemi Naga nung nem tenük amur senotsü temeshiba ajak magütsür, saka mapa shitak tenzüka inyaksü aser shitak renema inyaksü ta asüba purtem nemang senotsü shitak anogo kata menua melii agütsür. Ibajibo BJP teloki yimsü asüba mesüra Congress teloki yimsü asüba state ta masü, kechiyong state ajak Indian states, anungji state nung shirnoki mapa shitak inyaker parnok nem senotsüa shitak lemsüktsütsü. Aji oda, asenok senotsü agi timatempa ya India government ket nung sen makaba agi masü saka asenok ket nung ochi makaba agi timatemer. Kasaji center government-i Nagaland memeimba agia masü saka asenok dak temeimtsü maketba agi meimnüseta memeimtetter. Aji oda, küm shia tang ama March ita atemdang, Comptroller and Auditor General ajanga agütsüba Nagaland senotsü osangji reprangdangra, asenok ochimashi mapatemji tanü dangtsü nung asenoksasa asenok jak angu ama angutsüsa sadaka sayur saka asenoki memelenshir. Asenok asoshi timtemji aji lir. Atangji, asenok asoshi timtemji küm shia senotsü sentong tarulen dang nungibo teindoklen teimba ser 'deficit budget' nung tenzükba masü saka asenok ochimashi mulungsentsü dener teti 'trust deficit' nung aliba agi Tsüngrem nungia aser nisung nungia teyari arulen mali asenoksasa asenok timatemer. Asenoki tangari asenok dak temulung lemtettsüsa litetra, budget-jibo 'surplus budget' dangi arutsü.

OLEMSABANG

ELECTION SEN

~ L. Kika Pongener.

Alima tenzükba mapa tulus menden tajung nung amen
Linük rongsen ketdangsutsüba mapa shilem tulu agi ata;
Linük rongsen anak-aoyi amai mezüngmai yashia amshi
Nübur meyong rongsen alozuka pei agitsü maongka angu.

Asentsü sena, belemseta meinyaki, zübazüba-a anguba sen
Linük terenlok mapa inyaksü nungdem nung agütsüba sen;
Kolem dang arakzua, zülu-banglo mapa agi küli kar sayur
Manger mesangwa tsüngda lakh-patti, Crore-patti aküm.

Angadi anguba sen; kong kechi nung ayutsü ta shisabulur
Nübur-i anungba marem, tatem nung Election-i aitsü lemtet
Election-i aitsü yimyim ayimoktsü; teyarinur aika nungden
Melamela bendenba sen, angadi angu, angadi nung endok.

Alu zünger telok, kiyim lanutsür telok, kiyim lanur telok
Telok tentet zünger mezüngmai tenung jateter sendener;
Merijang paikaji küa, lakh paikaji küa, crore paikaji küa
Telok zünger mezüngmai jenjang atakteter akhanger.

Yimsüsür, arogo tenzük, sarasadem telok, lokti lennir
Odi-odia masü, kipok nung miimshia, supokrem meshir;
Election merük-merüka agitsüba yimyim ayimer telok.
Merijang menden, lakh menden, crore menden akhanger.

Saka Election nung aaba sen agi tajangzük kecha mangu
Chidiyungdi, azümesen, achi-ajem mazüok-ang tali aküm
Tali chia-ajemba agi Sugar, Blood Pressure, Cancer adok
Election sen ajak-to mozü-mora, Hospital nung endokma.

Election nung anguba sen agi RCC ki, Building ki yanglu
Kimung-lumong, senti rongsen, osettsüset tajung aliden
Saka kanga tia maka ajongbena lendong tulu kar atalok
Ki tajung nung-to melishi, osettsüset tajung-to magishi.

Kibong makamait tia nungi jenjang tera tajungba aküm
Sen akaba agi tera asüküma mezümeküma küma-adok;
Nüktapangdatsü, japo-jaritsü tenzük, tenük tasen adok
Apuani temeim mekongga kümer balalulatsüsa aküm.

Ajongben anguba rongsenji ajema akümtsü
Saka züsenba agi shibai terara bendendir aji züintsü;
Tiyazü agi ajangzükba rongsen; meyipzua alungba tangola
Aoksa-a rongsen dak tashikang dener Orija ama yima aor.'

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Nagaland Bible College, Mkg nung 42buba Graduation sentong agi



March 30, 2023 nü Nagaland Bible College, Mokochung nung 42buba Graduation sentong agidang Swindon, U.K nungi Rev. Martin Poole-i tongti o jembi aser graduate asürtem nem temoatsü meshia sarasademtsüba mapang tangokba noksa nung angur.

Mokokchung, Metsüremi/ March 30 (TYO): Nagaland Bible College (NBC), Mokochung nung tanü 42buba Graduation sentong March 30 nü NBC Discovery Hall nung agiogo.

42buba Graduation sentong agidang Master of Divinity nung 8, Bachelor of Theology nung 8, Bachelor of Ministry nung ka aser Certificate of Theology ka, ta nisung ajak agi parnok 18 Graduate süogo.

Iba Graduation sentong nung Swindon, U.K nungi arur Rev. Martin Poole-i tongti o jembidang pai, Nagaland ta asüba nungja ya pai 2005 küm ang angashi aser mongudang liasü saka tanü Nagaland Bible College Graduation sentong nung tongti o jembitsü maongka ngutetba ya Tsüngrem sentong lir, anungji Tsüngrem nem tenüngsang agütsür, ta ashi.

Theology nung graduate asüba jesi tesüngmangtsüka lir, kechiaser alima nung nübürtem

aika timtem aser nüngdak balala agi tonger lir, ano tanela nung temoatsü aginer jenti dang lir, anungji nenoki item dang jagi oor parnok yaritsüji Tsüngrem taginüba lir, ta Rev. Martin Poole-i Graduate asürtem ayongzüka ashi.

Poole-isa graduate asüba kisüng jagi periogo ta mebilemstüla, saka liyonga aodang sentong ajakji Tsüngrem nem nunglokjang, süra nü sentong nung Tsüngrem adentsü aser Pai takok agütsütsü, ta shisem.

Tsüngremi Eden tsüki yanglu aser yangji Tsüngremi Adam den jembi, Adam aser Tsüngrem tena tsüngda tesentaktep kanga dang tajung liasü. Yamaji Graduate asürtem mulungjang ajakji atsüki ka ama kümdakjang aser Tsüngrem den tesentaktep tajung yangluang; ibaji ajanga nü takum nung Tsüngrem sentsüwangshidakjang, ta Pool-isa Graduate asürtem ayongzüka jembi.

Sentong nung Tsüngrem temoatsü jazüka lecturer, Joji Thomas ajanga sarasademba den Artang Baptist Arogo Pastor Rev. Dr. Bendang Longkumer-i tajungshi o jembi, tarur pelaa agizükba o IIC-coordinator Limaonen-i jembi aser NCRC Youth Fellowship Mkg. Town teloki temeja ken ka tena telok ajungmeso aser Graduate asürtem tenüng nung M.Div.III azünger B.T.Nahwang-i jembi.

Kasa sentong nung Librarian, Akumba-i Lai tekong kar zünga telok ajungshi, Academic Dean Sam Santoshi Kumar ajanga Academic Awards agütsüba den NBC Principal Dr. Sentila ajanga Graduate asürtem Commission sütsü aser Graduate asürtemia ken tajung ka tena telok lemladaktsüba den sentong tatem küma Tsüngrem nem tenüngsang aguja Temsüsangba-i sarasadem. Iba sentong ya Lecturer Süngjemnaro-i ketdangsüa agia liasü.

Uganda nung Muslim nunger kari par kinünger pastor ka tepset

Nairobi (Kenya), March 29 (Agencies): Tan ita tetenzüklen Uganda nung Muslim nunger kari par kinünger pastor ka kidang nungi anizüka oor tepsetogo.

Muslim nungeri Pastor, Adinani Bulwa anema inyakba ajanga taküm January ita nung pai northern Uganda toktsür jena arua Bugiri district kübok Muterere yimda par kidang ali, ajisüaka March 10 nü par kinüngertemi pa tepset. Pa arrshi küm 42 liasü.

Osangbener den jembidang pastor kinüngtsü, Zabiina Newumbwe-i, "Onoki kinüngertemi den Khrista osangtajung lemsatep tenzüka liasü, aser February ita tetenzüklen ozü kinünger Muslim nunger pezüi Khristan yimsü agizüka liasü, ajisüaka kibong nung adianu rongnung tambusangi [Pastor Bulwa tedi] Khristan yimsü magizük aser onok dang Muslim nunger Khristan yimsü dngi meyipdaksüba anenang, ta onok amokmerena liasü," ta ashi.

"Hopta ana lir kinüngertemi senden ka nung adentsü atema

kü kinüngbu jaok, aser iba senden nungji pa dang Khristan yimsü tokjang ta ashi, ajisüaka pai Khrista atema asütsü melunga lir ta kinüngertemi dang ashi," ta laisa metetdaksü.

March 10 aonung 9:30 ako meta par kinünger Muslim nunger aika jashia par kidangi apu, ta lai ashi.

"Parnoki, 'asenok ya Muslim kibong aser Allah ya asen Tsüngrem' ta ashi. Onok kanga tsüba liasü, anungji kü den tanurtem takdangi ia atsüka liasü saka kü kinüngbu bo common room nungi mainshi," ta laisa metetdaksü.

Parnok ki telungi aitba sülen Pastor Bulwa kimai anizüka anir ao, ta lai ashi.

"Kidang nungi metre 200 shi pilar onoki timtemba ola angashi. Onokbo ki telung nungang liasü. Kü kinüngbu kidangi meyipa maru. Anepdang ni kiyonger Khristan ka ajuru aser kinüngbu bushia aoba mapang nung kü kinüngbu ali nung ondaka angu," ta lai ashi.

Pastor Bulwa tenütsü nung zübo tuluka liasü, tetsüng

tabelen nunga zübo liasü aser pa tekong nung pa alenseta südaktsüba sü ka liasü, ta lai ashi.

Iba tesem nungji Khristan aika adenshi aser pastor Bulwa'er kinüngertemi aritepa pa temang ali nung arem.

Pastor Bulwa-i pa kinüngtsü den tanur pongu toktsür süogo.

2016 küm Pastor Bulwa-i par kibong North Uganda kübok aliba Lira-i anir aoba sülen mendi lu yima liasü. 2019 küm January 24 nü par kibongi miima Islam yimsü toktsür Khristan yimsü agizük, iba sülen par Arogo nung pa-a pastor shima liasü.

Pai Muslim nunger aika Khristan yimsü dangi meyipdaksü aser pa leniba nung tekülem sentong agia liasü, ajisüaka yaküm December ita nung kinünger kari Pastor Bulwa aser par kibong Tenla ki kima anguba sülen iba osangji prokshia liasü.

Iba mapang nungjagi tenzüka Muslim nungertermi par kibong dang nenok mosque-i marura tepsettsü ta amokmerena liasü, ta lai ashi.

ANOGO ABEN TSÜNGREM DEN

Temoatsü agizükba

"Koda, asenokbo Tsüngrem ket nungi tajung dang agizüker tamajungbo magizüktsü asü?" Yob 2:10


Aikati yob ji taremzük nisung ka ta bilemer. Saka iba dang nungi tali Pa lir. Pa rongsen tulu akaba nisung ka liasü. Pa tekümdang, mapa meranga inyakba, aser tashi angaba agi Tsüngremi Pa moatsü asü? Asenoki memetet, Pa san 7,000, ut 3,000, nashi pungchi 500, aser gado 500 liasu ta asenoki Yob kaket nungi angazüker (1:3). Pa ano sarasademba taküm ka liasü (1:5). Tsüngremi satan dang Pa akaba ajak aser chirtem agitsü temelaba agütsüra, Yob telangzübaji Pa tiyongtsü masü, saka tsüngrem tiyongtsü liasü: "Kibubai agütsü aser Kibubai bener aor.

Kibuba tenüng temoatsü süang" (1:21). Kodang Satani pa temang nung kongshi tebuttsü Tsüngrem indang asüngdang. Yob telangzübaji Khristanem asoshi lesson tajung ka lir." Asenoki Tsüngrem nungi tajung dang agizüker tamajungbo magizüktsü asü?" Aikati Yisu Khrista Kibur aser Kümtetdakba ta agizükra timtem kecha agia matongtsü amai bilemer.

Saka shidakba nung yamaji masü. Ken kenbo asen tamang den mesütep ataloker. Pauli ashir, "Khrista nung temeshiba alitsü meranger ajak rishikangshitsü" (2 Tim 3:12). Tsüngremi asenok nem kanga moatsür aser Pa temoatsütemji ka ken ka ken ta züngdangbaji Khristan ka teinyaktsü lir. Asen tamang aser jakla Tsüngremi tendanger. Asenoki Pa temoatsütem agizükba ama Pai tentangbajia agizüktsüla. Aser itemji ajanga otettsü asoshi asenoki Pa dak metaloka alitsüla.

Tsüngrem, Nai ni kanga moatsüogo. Ne temoatsütem agizükba ama Na nungi aruba tatitang agizüktsü kü tamang ulua kümdakjang.

Cameroon nung Laishiba meyiper ka tepset



March 30, 2023: Cameroon linük nung Laishiba meyiper (Bible translator) kati dictionary atema oshi balala nung olong bendenba workshop ka ayongzüka agiba sülen kidangi meyipa aoba mapang nung prangpong amer telok kati pa puer aoba sülen tepset.

Laishiba meyiper, Wuwih William Gemuh leniba nung Mfumte nung oshi balala nung Laishiba meyipzüka maparen inyaka liasü.

Pai kinüngtsü den tanur trok yutsür süogo. Cameroon Association for Bible Translation and Literacy (CABTAL) director, Keyeh Emmanuel-i, "Onoki par kibong aser pa den külem tenzükertem melung süngzüktsütsü atema inyakdar. Onok aser Wuwih'er kibong atema sarasademjang ta onoki mepishir," ta metetdaksü.

Northwest Cameroon nung oshi balala nung Laishiba meyipertemi mapang ajak nung timtem ajangshir, kechiyong tang linük nung separatist teloktem aser sorkar na tsüngda raraba den külemi Islamic kiralongrar telok Boko Haram-ia mapang shia amaker.

Wycliffe Bible Translators nung Executive Director, James Poole-i, "Onoki Cameroon nung aliba adianutem den külemi mangyimer. Onoki Khristanem aser Arogotem dang pa kinüngtsü aser chirnurtem atema sarasademjang ta mepishir," ta metetdaksü.

"Ajungbena Wuwih tepsetba ajanga, Laishiba meyipba maparen ya kanga keraa inyaktsü nüngdak ta angateter, kechiyong Laishiba ajanga dang ajaki Yisu metettsü atema maongka angutsü," ta paisa metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Pipok

(v) Lenmang tasen lapok (construct new road) * Alu tonga aotsü atema yimertemi gari lenmang ka pipok.

Pisü

(adj) tenükzü chila, junga amua mao (sleepy) * Amui junga maoba agi tenük pisüa alir.

OLONG PAITEP # 6473

Grid for OLONG PAITEP # 6473 with numbers 1-16 in various positions.

TIPIEN

- 1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjildong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6471 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sur.



CLASS 7 NUNG AZÜNGER DANG MISSLAI "TAKÜM NUNG KECHI KÜMNER" ONÜK NUNG ASÜNGDANGYAR :

- Missla : Alokba tekolok techirabaji nai tama shiang, na kechi kümner?
Alokba : Nibo Nagaland nung Chief minister kümner, yamaji asünungbo Gari aika akatsü, Hotel aika yanglutsü, Resort zünger mezüngma amenoktsü, adianu aser kinunger aika takar kümdaktsütsü, aser ang....
Missla : Ojang dang shiang, nüdang essay ka züngang ta mashiato, ojang ka ana agi langzüsüla. Waraklai ojang ana amshia na kechi kümnerar shiang.
Warakla : Alokba tebutsü, he he he!
-Lilir : WhatsApp

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Arunachal forum-i dam indang ken o benok

Itanagar, Mesüremi/March 30 (Agencies): Siang Indigenous Farmer's Forum (SIFF) lensüba nung Siang valley nung anti-mega dam movement inyaksangshia arudar aser parnoki Arunachal Pradesh kübok Siang ayong nung 10000 MW dam ka yanglutsü atema benoker aliba ken o ya tawa Nepal yimtiba Kathmandu nung UN South Asia Business & Human Rights Forum senden amenba mapang benokogo.

SIFF-i, Forum dang iba ken o dak sendakba nung parnok tebilemba lemsateptsü, len sayutsü aser ken o nung teka amoka inyaksü mepeshia asüngdangogo, ajita asüngdang sorkar den tangatettep nung sensaksema nüburtem akoksatsü aliba nungi jenbotetsü, ta ashi.

Parnoki ashiba agi, dam yanglutsü benokba anema parnoki 2013 küm Arunachal Pradesh sorkari MoU tem nung sign asüba mapang nungi rara arudar.

"Iba mapang nungi tenzüka onok anema inyaksangshia arudar aser onok züngsemtem police aser ketdangsurtemi merenshiba den amokmerena arudar," ta SIFF-i ashi.

Siang Stage-II nung benoka aliba project ya NHPC nem agütsüogo.

SIFF-i ashiba agi, dam agi konshitsü aliba aluyimertem aser SIFF züngsemtemi anema nokdakaka NHPC-i tashiyim agi aonung dam dak sendakba nung inyakyaim balala benoka inyaksangshia arudar.

"Parnoki taruba kümtem nungibo army aser paramilitary forces tem dena amshitsü ta amokmerenogo," ta SIFF-i ashi.

Forum-i ashiba agi, parnoki tang Arunachal Pradesh chief minister ya water resources, river development minister asüba mapang pa den rejuvenation Uma Bharati aser iba mapang union minister Gajendra Shekawat nung nem temepshiba agütsüogo.

SIFF-isa, parnoki Gauhati High Court, Itanagar Permanent Bench nung 2014 küm PIL ka benokogo aser iba ken o ya 2022 küm petitioners pusema obendang agütsüogo aser state sorkar dang tarutsü nung iba amala project atema project ajanga kongshiba local tem den angatetteptsü aser parnok temelaba agütsü tetuyuba agütsüogo, ta ashi.

Ajisüaka ketdangsurtemi High Court tetuyuba sülen manidaker, ta parnoki shisem.

"Siang ayong ya Siang valley nung aliba nüburtem atema kanga tongbang lir. Iba ya Adi nung er meyong lir aser shilem kar kija aser kin kar meyong lir.

"Iba ayong ya Adi nung er atema puti otsü nung kanga tongtibang ayong ka lir.

"Valley nung aliba nüburtem puti otsü poktetba den iba ayong ya sendaktepa lir aser ibayongji sobaliba, puti otsü, tar nung er otsü, sobaliba ken ajak iba dak sendaka lir.

"Ajisüaka iba dam yangluba ajanga yimtsüing aser jila aika metsüngtsü aser sensaker aluyimertem ali makai akümtsü," ta SIFF-i ashi.

Maneni SIFF-i, iba dam ya yanglura iba ajanga Siang valley nung teraksatsüba aika atoktsü aser iba atema temenok agütsüba yagi nüburtem rehabilitate asütsü asoshi teperi masütsü, ta ashi.

Siang valley ya alima nung bio-diversity hotspots ka lir. Ali tuluka metsüngdaksüba ajanga süngtonglilon aser arem shiruru aika samadaksütsü, ta forum-i ashi.

Mizoram: AR headquarters Aizawl nungi Zokhawsang-i belentsü

Aizawl, Metsüremi/March 30 (Agencies): Assam Rifles-i Mizoram nung parnok indang headquarters Aizawl nungi Zokhawsang-i belener aotsü.

Iba osang ya union home minister Amit Shah-i metetdakja liasü, ta official sangdong ka ajanga metetdaksü.

Aizawl nung Assam Rifles headquarters ya Zokhawsang nung battalion headquarters-i belener aotsü, ta sangdong nung shia lir.

Zokhawsang ya Mizoram yimtiba Aizawl nungi km 15 shi pilar lir.

Iba osang ya Union home minister Amit Shah-i Mizoram MP C Lalrosanga nem Mongolbarnü New Delhi nung senden amenba mapang metetdakja liasü, ta kasa

sangdong ajanga metetdaksü. India nung paramilitary force tejentiba Assam Rifles indang headquarters ya mapang tatakzük ka nung Zokhawsang-i belener aotsü.

Temetetsükaji union home minister Amit Shah-i Mizoram semdangba mapang Zokhawsang nung Assam Rifles Battalion Headquarters Complex yanglutsü atema nungshilong azüngtsütsü.

Union home minister Amit Shah-i Mizoram April 1 nü semdangtsü.

Mizoram semdangba mapang Amit Shah-i sen crore 2000 alang project semzüktsütsü.

Amit Shah-i anogo ka atema Mizoram semdangtsü aser iba mapang pai crore 2414 alang development project tem

semzüktsüba den project balala atema nungshilong azüngtsütsü.

Amit Shah-i tongtibang project trok atema Mizoram nung nungshilong azüngtsütsü, kong Zokhawsang nung Assam Rifles Battalion Headquarters Complex yanglutsüba aser Smart City Ltd (ASCL) kübok Integrated Command and Control Centre (ICCC) atema nungshilong azüngtsütsüba densema lir.

Iba dak alia Home Minister-i, Zorinpui - Longmasu NH-502A, Aizawl Bypass (Package-1), NH-6, Aizawl Bypass (Package-3), NH-6 aser Laldenga Centre yanglutsü atema nungshilong azüngtsütsü.

Iba sentong nung Centre aser Mizoram sorkar ketdangsur tejentem aikati shilem agütsü.

Manipur nung cough syrup shibelener ana apu

Imphal, Metsüremi/March 30 (Agencies): Manipur Police-i Bresthostibarnü state tem tsüngda temesepba mozü shibelener arishi küm 39 tain tetsür ka aser arishi küm 40 tain tebur ka puogo.

Bodhbarn aonung Imphal West district kübok Lamphel Sanakeithel Supermarket temeket meita aoba mapang codeine-based cough syrup (CBCS) bottle 921 aser tashishitsü aketba kuli kakat kar nguteta liasü.

Ken o nung aija pua alir ana ya Manipur, Kakching district kübok Kakching Sumat Leikai, Ward number 2 nung alir Samurailatpam Rojina aser Imphal West district kübok

Hatta Golapati nung alir Md Riyajuddin ta jangaago.

Imphal East district police-i Bodhbar aonung aser Mongolbar anepdang na tsüngda temesepba mozü shibelentsü ta osang tejangja ka angazükba sülen police-i meita orr pharmacy store ka puteta liasü.

Superintendent of Police, Kshetrimayum Shivakanta lenisüba nung Imphal East district police team-i Lamphel Supermarket, Imphal anasa aliba Universal Pharma medical store meita ao aser aija alir ana den ya ozüng alema shibelenba osettem pua liasü, ta Police-i Bresthostibarnü ashi.

Ken o ashishiba sülen, tena

yagi iba temesepba mozü ya temelaba maliba customer tem dang ayokba puteta liasü.

Tanga state nunga dena tesendaktep lir ta tenati nangzüka liasü.

Cough syrup ya northeastern state tem aser talisa Assam, Nagaland, aser Manipur nung heroin, brown sugar amala temesepba mozü achiretemi temelen amshir.

Doctors temi temelaba agütsüra item mozütem ya Manipur nungbo ayoktsü melar.

Aija alir den parnok ket nungi apuba osettem ya Lamphel police station nem bendanga agütsüogo, ta police-isa metetdaksü.

GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA

NO. DTE/ ESTT-2/02/2021-22/ /Dt. Kohima, the March. 2023.

NOTIFICATION

In supersession of this Office Notification NO. DTE/ESTT-2/02/2021-22/4377, Dt. 9th Feb. 2023, it is hereby notify all concerned that the Ministry of Education, Department of Higher Education, GOI has allowed taking admissions in the affiliated colleges to the Central University as per the past practice instead of CUET for the session 2023-24 due to certain impediments in conducting the CUET-UG 2023 in the North Eastern Region.

The prescribed application form for the Nagaland State Entrance Examination (NSEE)-2023 may be collected from the office of the undersigned on payment of Rs. 200/- (Rupees two hundred only) per form or can be downloaded from the website www.dtenagaland.org.in in which case the fees should be paid while submitting the form in white paper (A4 size), w.e.f 4th to 29th April 2023.


The last date for receiving the filled-up application form by hand is 29th April, 4:00 p.m. Students who have appeared /passed Class-12 (Science) or equivalent are eligible to apply.

The Nagaland Board of School Education (NBSE) Nagaland will publish the examination date for the conduct of NSEE-2023 in due course of time.

(Er. Vipulhou Lhoungu) Director

COMMERCIAL LAND FOR SALE

Location: Niuland Highway Attached
Adjacent to upcoming Mega Water Park
Hozukhe Village, Niuland
100x100 @ 4.50 lakhs
Land Available upto 50 Bighas
Payments can be made in 2 installments



FOR DETAILS CONTACT : 9862954673

Philippines rong mükepokba nung asür nisung 31 jungogo

Manila, Metsüremi/March 30 (Agencies): Passenger aser ktdangsür 250 shi mena aliba rong ka southern Philippines nung mi adoka nisung 31 tzü nung arakseta mesüra mi nung asü aser mapang tatsüka lir parnok tasü mang ngutet, ta province ka indang governor-i ashi.

mejanga aliba sak. Kar rong nungi pongzü, ta Hataman-i osangbener dang telephone ajanga ashi.

Iba lendong nungi kumzüka alirtem ya aika tetsübo agi Bodhbarnü MV Lady Mary Joy 3 rong nung mi adoka lia tziyim nung pongoktsü aser parnok ya coastguard, navy, ano rong ka aser yangji angopur temi kumzü, ta linük south tsütsü Basilan asetkong province indang Governor Jim Hataman-i Brehostibarnü ashi. Ano nisung tenet shi samar bushiba mapang lir.

Coastguard temi noksa lemsatepva nung MV Lady Mary Joy 3 nung tzi khalokja liasü aser passenger tem tzi kum leni anir aruba nguogo.

Mi agi ronger aliba rong ya Basilan tzi kum leni atsür adok, kong coastguard aser ktdangsür temi passenger cabin indang budget section nunga tasü mang 18 ngutet, ta Hataman-i ashi.

Nisung aika samar alitsü, kechiaser rong indang manifest nung tenü ng zülua aliba nisung 205 dang nungi timba mena liasü, ta Governor Hataman-i ashi.

"Mi ajanga item nisungtem ya rong nung asü" ta Hataman-i ashi. Bushisü dang tenzü kogo aser rong indang manifest nung mezülusemer lir ama bushiteta lir, ta pai ashi.

"Manifest nung tenü ng mezülüokba passenger tema alitsü. Takum kumzü kertem Zamboanga aser Basilan nung anir oa mi agi ronger alirtem anepalutar, ta Hataman-i ashi.

iba rong ya south tsütsü rongnendak Zamboanga yimti nungi Sulu province nung Jolo jila bushia aodang len tom nung Basilan anasa ayatirm adongtsü lia mi adoka liasü, ta ashi.

Mi ya komasür adokar ano mejangja.

Rong nung mena alir nisung 23 shi yiru aser parnok mozüki balala nung anir oa lir.

Mi adokba mapang passenger kar tziyim nung pongok, ta Basilan disaster agency tekolakba Nixon Alonzo-i ashi.

Mi ajanga nisung ola adoktepba angashir passenger kar

"Asürtem kar rong nungi ngutet aser kar tzi nung arakseta asü. Asürtem kar mi agi arongba tarak lir," ta pai ashi.

Coastguard temi bushisü dangba aser safety assessment nung yariteper aser totzü inshia ali-mali bushir, ta ashi.

Philippines ya asetkong 7,600 dak tema agi kumtetba linük ka lir, kong tziyim nung senzüsempingba tsütsü otsü tamajung lir, kong rong nung nisung tali amener aser rong tejen aika tang tashi amshir.

Taoba küm May ita kanga kera jajaba Philippines nung rong ka nung nisung 134 mener lia mi adoka nisung tenet asü.

Myanmar nung NLD party shibangtsüba linük balalai aitsür

Naypyidaw, Metsüremi/March 30 (Agencies): Myanmar mitkar temi taoba mapang linük yimsü süa aliba party shibangtsüba asoshi Australia, Japan, United Kingdom aser United States linüktemi shisabolua bilemstüba lemsatepogo aser iba mera yagi azüdokshi agi raksatsür aliba linük nung tensa tali tamajungba kumdahtsütsü ta tekum dangtsü ashi.

aitertem pua merenshiba mapang Myanmar sepaitemi nisung 3,000 dak tema tepsetogo, aser mitkar temi yimsü asüba anema nok-nü amer nokdaker tali akum. Rara mechi nisung million ka dak tema tesem balala nung prokshia lir, ta United Nations-i ashir.

Mitkar tashi ulushitsü atema election agitsü aliba nung tenü ng mezülüokba mechi Myanmar mitkar temi Aung San Suu Kyi'er National League for Democracy (NLD) aser danga party 39 tashi Myanmar mitkar temi anentsür anogo ka lir Bodhbarnü iba osang ya sangdonga liasü.

Arishi küm 77 tain Aung san Suu Kyi, shiba mitkar temi tashiyim amshia sorkar atsü ng dok dang apu, la ken o balala nung aika küm 33 asoshi tepuokdak yua lir aser ano lar NLD nung lenir aika tepuokdak lir mesüra linük doktsür jena ogo.

Election atema anogo lateta mali. NLD ajanga election nung shilem magitsü ta jembia arur aser iba election ya chichiba masü ta ashir.

US State Department deputy spokesperson Vedant Patel-ia osangbener den jembidang, political pary 40 tashi anentsütsü telemtetba agiba Washington-i khukhua aitsür, ta ashi.

"Yimtenren nungi NLD atsü ng dokba ajanga tensa tajungba akumtsü asoshi tali tasakba akumtsü ta onoki khuret süa bilemer," ta Japan indang foreign ministry ajanga sangdong ka nung ashi.

"Burma nung stakeholders ajak medeni election agira aji talenba makai junga agiba ama mezü ngshitsü," ta Patel-i iba Southeast Asian linük indang tenü ng tejenba amshia ashi.

"Japan-i Myanmar dang Suu Kyi densema NLD ktdangsür tekeratiba nung chiohtsü aser party ajak densema yimjung asoshi pangzü ng ka yanglutsü atema lenmang sayutsü ajungshir."

UK indang foreign office-ia NLD aser danga party tem shibangtsüba aitsü aser ibai Myanmar nübur indang temeden aser tashi anema inyakba lir, ta ashi.

Myanmar nung mitkar yimsüsür rongnung tekolakba Senior General Min Aung Hlaing-i Hombarnü alima nung par aitsür dang pai democracy tanaben amenoktsü merangba nung yaritsü ajungshia liasü.

"Mitkar yimli-i yimtenren nung rangloker mera agiba tem aser opposition tem ajemreptsü aser tetsübo aiddaktsütsü tasa tali amshiba onoki aitsür," ta UK indang foreign office odongtari ashi.

2021 küm February ita mitkar temi tashiyim amshia election ajanga shimtetba Aung San Suu Kyi'er sorkar atsü ng dokba sülen Myanmar nung rongrongshirong agi sünga lir.

Myanmar nung election registration atema ozü ng tesashi yangluba ajanga yimtenren tsütsü teimla tali temesüba kumdahtsüba atema khuret sa bilemstür, ta Australia indang Department of Foreign Affairs and Trade ajanga ashi. Yimtenren nung stakeholders ajak shilem agidaktsütsüla aser parnok medendaktsüba ajanga maneni azüdokshitsü aser tensa

tamajungba akumtsü, ta ashi. "Onoki maneni iba yimli indang inyakyim mita reprangtsü aser election tejangja agiba densema democracy tanaben arudaktsütsü asoshi ayongzüker," ta sangdong ajanga ashi.

Tarutsü nung election agitsü atema voter lists yanglushiba densema mitkar temi teinyaktsü ajak inyakba sülen NLD ya anentsü. Voter lists atema civil data bendenba team tem dak 'resistance forces' temi amaker, shirnoki yimsüsüba menden nungi atsü ng dokker aliba NLD legislator temi kumtetba sorkar, koba dang National Unity Government ta ajar, parnok yaritsü nangzüka lir.

Tesem ajaklen election anema nokdakba ajanga iba election ya linük puti otsü nung azüdokshiba tsütsü tamajungtiba asütsü, ta lokti tentet balalai ashir, koba November ita agitsü akok.

Mitkar temi yimtenren aziüoktsü asoshi tali tejangjaba kumdahtsütsü atema election agitsü anema nütsü ng yoksük timbai nokdaker, anungji election agitsü merangra azüdokshi alitsübasas aser parnok anemer temi timtem agütsütsü merangtsü, ta ashir.



Paris nung longkak aitba mapang nisung kati jana arongba anasa France Tir Emmanuel Macron menüja noksa ka amer aiba yangi angur. Tir Emmanuel Macron-i mapa nungi anisü ngzütsü asoshi arishi küm 62 aliba nungi 64 kumtsütsü merangba anema linük tesem ajanga nung longkak ait tenzüka lir.

NECDC Interstate Friendship asayamung osang



Dimapur, Metsüremi/March 30 (TYO): NECDC Interstate Friendship Senior Men's Tournament tenzükur tanabuba anogo Nagaland Cricket stadium nung Manipur aser Arunachal Pradesh na asaya aser Sovima Cricket Ground nung Mizoram aser Sikkim na asaya liasü.

Nagaland Cricket Stadium nung toss akokba sülen Manipur team-i mezüing bat asütsü shim aser parnok jak senteper run 253 yanglua liasü. Parnok rongnungi Bikash Singh-i ball 86 nung run 74 yanglua jak dang run timtiba yanglu.

Asaya nung Pukhrabam, Langlonyamba aser Ngariyanbam nungeri run 4,3 aser 2 ta yanglua kanga kara out süatok ajisüaka Md. Basir Rahman-i (33 runs) opener ama kanga süngjema asaya aser pa nem Jotin Pheiroijam-i (28 runs) teyari agüja liasü.

Ajisüaka Manipur nung batsmen tem rongnungi Bikash Singh (74 runs) aser Md Sultan Karim (53 runs) nati tajungtiba asayateta liasü.

Arunachal team atema Abo

Nabam, Yab Niya, Darge Bagra aser Techi Doria nungeri wicket anana agi aser Techi Neri o Myendung Singhpo nati wicket kaka agia Manipur team over 49.3buba nung jak out sütsü.

Tanabuba innings nung Arunachal team-i kanga junga asaya tenzük aser opener Techi Doria-i run 31 aser captain Neelam Obi-ia run 26 yanglua liasü. Ajisüaka Manipur nung bowler temi ball kanga junga ona Arunachal nung batsmen tem mapangshia out sütsü aser over 44buba nung run 120 dang yanglu jak out süja liasü.

Manipur nung bowler tem rongnungi Kishan Laishram-i wicket asem, Rajkumar Rex, Bishworjit aser Md Sultan nungeri anana aser Ngariyanbam-i wicket ka agia liasü. Iba asaya Manipur team-i run 133 agi kokogo. Asaya nung man of the match naroküm Bikash Singh nem agüja liasü.

Kasa mapang nung Sovima Cricket Ground nung Mizoram aser Sikkim na asaya mapang Mizoram-i toss koka mezüing field asütsü shim.

Mezüing batting asütsü

maongka agütsüba sülen Sikkim team-i run 136 dang yanglutet, kechiyong Rinsangzela aser Remruatdika Ralte nati ball kanga junga aon aser Sikkim-i run 52 yanglu aliba mapang asayar pongu tashi out süja liasü. Ajisüaka Palzor Tamang (36 runs), Lee Yong Lepcha (25 runs) aser Jeetendra Sharma (17 runs) nungeri kanga meranga asaya over 38 nung parnok run 136 yanglua liasü.

Tanabuba innings nung Sikkim nung bowler Ankur Malik aser Palzor Tamang nati ball kanga junga ona Mizoram nung batter tem nem timtem agütsü. Malik-i wicket 6 aser Palzor-i wicket 3 agia liasü.

Mizoram atema Zothanzuala (23 runs), Joseph Lalthankhuma (21 runs), Lalhruiamawi (12 runs) aser Lalhruiamawi (10 runs) nungeri kanga meranga asaya ajisüaka over 39buba nung run 88 dang yanglu parnok jak out sümatok. Iba asaya Sikkim-i run 48 agi koka liasü. Asaya nung run 36 yangluba den wicket 3 agiba atema Palzor Tamang nem man of the match naroküm agütsü.

Sir Alex Ferguson aser Arsene Wenger na Premier League Hall of Fame nung züngoksemogo

Metsüremi/March 30, 2023 (Agencies): Nüngtugu manager Sir Alex Ferguson aser Arsene Wenger na Bodhbarnü Premier League Hall of Fame nung züngoksemogo.

Tenati Manchester United aser Arsenal nung tenüing tajung yangluogo aser tena senteper Premier League title 16 kokogo. Premier League puti otsü nung manager tem toktepa aruba rongnung tena toktepa ya jak dang nüngtugutiba lir.

Hall of Fame nung züngoksemba ya League-i agütsüba tetushi jak rongnung tematiba lir.

Sir Alex ya Premier League puti otsü nung manager tem rongnung takok tajungtiba anguba manager lir. Pai PL 13 ben kokogo aser mapang balala ana nung league season asemsem atonga kokogo.

Old Trafford nung küm 27 inyakba mapang pai aniba Man Utd team-i 1967 küm sülen 1992/93 season nung mezüingbuba Premier League koka liasü.

Pai tatemsa 2012/13 season nung Premier League akokba sülen coach mapa tokja liasü.

Ferguson kübok asayaba asayar trok; David Beckham, Eric Cantona, Roy Keane, Wayne Rooney, Peter Schmeichel aser Paul Scholes Premier League Hall of Fame nung züngoksem lir.

Sir Alex-i Premier League nung asaya 810 nungi 528 kokogo aser point 1,752 ngua liasü. Pa nem Manager of the Season naroküm 11 ben aser Manager of the Month naroküm 27 ben agütsüogo.

"Premier League Hall of Fame nung züngoksemba atema kanga pelar. Iba amala naroküm agizkba ta tetushi tulu lir," ta Sir Alex-i ashi.

"Arsene-a iba tetushi agizüktsü kanga tetemsü ta amanger, shibai Arsenal Football Club melenshitsuogo," ta paisa ashi.

Kasa mapang nung Arsene Wenger lenisüba nung Arsenal team season 22 asayaogo, koba Premier League record ka lir.

Pai Premier League asem ben kokogo aser 2003/04 season tepeyong asaya ka nung danga tamakok mongui asayaba otsü tasen ka yangua lir.

1996 küm Bendanger manager mezüingpur ka ama

Premier League nung arua adenba sülen pai club aser league nung temelenshi aika bener arutsü.

Pai football asaya yimya tasen bener arua temelenshi bener arutsü aser yamaji 1997/98 season nung League title koka liasü.

Pa lenisüba nung club asayaba mapang pai Hall of Fame züngsem Thierry Henry aser Patrick Vieira nung amala asayatem anir arua asayadakja liasü.

Wenger-i otsü tasen ka yanglua Premier League asaya 828 achaayangogo, kong pa lenisüba nung par team-i asaya 476 akok aser 199 draw süa liasü. Pa nem 1998, 2002 aser 2004 küm Manager of the Season naroküm agüja liasü.

"Premier League Hall of Fame atema ni shimba asoshi kanga pelar. Ni Arsenal meimba nisung ka ama züngshidaksüner, shibai club akümtsübuogo aser tuluba kuma renlokyonga aotsü atema jenjang tajung ka nung toktsürogo," ta Wenger-i ashi.

"Sir Alex den iba ya lemsatepba ya ni asoshi tetushi tulu lir," ta paisa shisem.

AFC U-17 Asian Cup: India team Japan, Vietnam, Uzbekistan den asayatsü

Metsüremi/March 30, 2023 (Agencies): AFC U-17 Asian Cup nung India team Group D nung Japan, Vietnam aser Uzbekistan den asayatsü ataogo.

Iba asayamung ya Thailand nung June 15 nungi July 2 nü tashi asayatsü. Asayamung atema draw ya Bresthostibarnü Bangkok nung süa liasü.

Asayamung nung telok jak nungi temaba jenjang nung tembangba team anana knockout stage tem atema qualify asütsü. Semifinal tonga asayaba team pezü 2023 FIFA U-17 World Cup atema qualify asütsü, koba Peru nung asayatsü.

"Draw nung onok iba telok nung ataba atema pelar. Onok team tajung kar den asayatsü aser asayatem item asayatem

atema yongya atadar. Jenjang jak nung football asayar ajaki tajungtiba team-tem den asayaner aser Japan team ya Asia nung team tajungtiba rongnung ka lir," ta head coach Bibiano Fernandes-i ashi.

"India team taoba batch-i Uzbekistan aser Vietnam amala team den asayaogo aser parnok den kanga junga asayatetogo, anungji onok nükjidong atongtsü imla atar, koba (FIFA U-17) World Cup atema qualify süa asayaba mezüingbuba Indian team akümtsü asoshi lir," ta paisa ashi.

AFC U-17 Asian Cup ya Rajamangala Stadium, Bangkok, Thammasat Stadium aser BG Stadium, Pathum Thani, aser Chonburi Stadium, Chonburi ta tesem pezü nung asayatsü.

Madrid Masters: Kidambi Srikanth quarterfinal-i iogo

Metsüremi/March 30, 2023 (Agencies): Tang asaya aliba Madrid Masters badminton tournament nung Bresthostibarnü külem India nung asayar B Sai Praneeth straight-game nung koka Kidambi Srikanth tebur kija asaya quarterfinals-i iogo.

World no. 21 Srikanth-i tanabuba round asaya nung külem India nung asayar Praneeth 21-15 21-12 agi koka liasü.

Ajisüaka quarterfinals nung

pa asaya melara masütsü kechiyong pa iba asayamung nung top seed Japan nung asayar Kenta Nishimoto den asayatsü lir.

Tanabuba round nung France nung asayar Arnaud Merkle-i Nishimoto nem walkover ka agüja liasü.

Tebur kija asaya nung India nung asayatem rongnungi Kiran George, Priyanshu Rajawat aser Sameer Verma nungera iba asayamung nung shilem agidar.

Guwahati nung IPL asaya ana asayatsü

New Delhi, Metsüremi/March 30 (Agencies): Taruba Indian Premier League nung Northeast nung taküm mezüingbuba iba asayamung asayaba angutsü, kechiyong Guwahati nung April ita asaya ana ayongzüka asayatsü renemdar.

Guwahati nung Assam Cricket Association (ACA) Stadium ya Rajasthan Royals atema 'home' ground asütsü.

IPL nung Rajasthan Royals pur April 5 nü Punjab Kings den aser April 8 nü Delhi Capitals den asayatsü aliba asaya ana ya Assam yimtiba nung asayatsü.

"2020 küm IPL nung RR pur asaya ana ayongzüka asayatsü temelaba agütsü. Ajisüaka COVID-19 wara poktetba ajanga masayatet. Taküm idaki asaya ana ayongzüka asayatsü atema maongka agütsüba asoshi kanga pelar," ta ACA secretary Tridib Konwar-i PTI dang ashi.

Paisa, asaya ana atema renemshu tenzükogo aser ACA-i Rajasthan Royals team den

kanga junga sendaktepa inyaksangshidar, ta ashi.

"Onoki Assam aser Northeast ajunga nung cricket asaya meimertem dang arua asaya repringtsü ajungshir. Rajasthan Royals puri asaya atema online ajanga ticket ayok tenzükogo," ta Konwar-isa ashi.

Jaipur nung amendaker aliba club yagi taoba mapang ACA den cricket academy ka lapoktsü atema longjemogo, koba ACA Stadium nung tenzükogo.

Board of Control for Cricket in India (BCCI) joint secretary, Devajit Saikia-i ashiba agi, tetoktepba sashiraba ajanga national team nungi asayatsü atema maongka manguba cricket asayatem aika lir aser IPL ya parnok atema maongka tajung ka lir.

Guwahati nung asayaba mapang ajaki Assam nungi asayar Riyan Parag-i koma asayalir ta repringa atatsü, shiba Rajasthan Royals nungi asaya arudar.

BILEMDANGANG

"Temulung ken meyiper saka temelenshiji taküm tepiyong agir"